



Sesida dals

Communitgà ils

Protocol nr.

15 da zercladur 2026

18 da zercladur 2026

433/2026

Dumonda da la fracziun dal Center

concernent las consequenzas da l'imposiziun da taglia individuala per
l'administraziun (emprim sutsegnader Brunold)

Resposta da la Regenza

Tar la dumonda 1: Las entradas pli pitschnas u pli grondas en consequenza da l'introducziun da l'imposiziun da taglia individuala (refurma) na sa laschan betg eruir en-taifer il temp che stat a disposiziun per responder la dumonda. Questa lavur pretenda in'evaluaziun statistica voluminusa da las datas fiscalas. Las consequenzas finanzialas e persunalas vegnan eruidas en il rom dal project legislativ che vegn prendì per mauns per realisar la refurma, e preschentadas en il rapport explicativ da la consultaziun sco er en la missiva al Cussegl grond. Tenor l'avis da la Regenza èsi pussaivel, che la refurma pudess generar entradas pli grondas per il chantun, sche la soluziun federala vegniss surpigliada senza adattar la tariffa da taglia. Areguard la cumpart chantunala da la taglia federala ston ins – concernent entradas pli grondas u pli pitschnas – spetgar sin il resultat da l'iniziativa dal pievel pendenta «Gea a taglias federalas gistas er per ils pèrs maridads – Per finalmain metter ina fin a la discriminaziun da la lètg!», che avess consequenzas finanzialas considerablas per la taglia federala directa.

Tar la dumonda 2: La refurma pretenda ch'ils registers, la declaraziun, la taxaziun e l'incassament vegnian adattads al nov dretg fiscal. Sche l'iniziativa dal pievel menziunada vegniss acceptada, daventass l'adattaziun anc pli complexa. Emprimas stima-ziuns approximativas ha la Regenza fatg en la sessiun d'avust 2025, cun responder la dumonda Dürler concernent las consequenzas da l'introducziun da l'imposiziun individuala per il chantun e las vischnancas (PCG 1/2025–2026, p. 125). Per realisar la refurma tenor la soluziun federala dovri almain tschintg plazzas a temp cumplain gia avant la refurma. Per la taxaziun e l'incassament suenter la realisaziun da la refurma dovri circa 20 plazzas a temp cumplain (repartiziun cun las vischnancas ch'èn participadas a la taxaziun). Fin mez da l'onn 2027 vegn l'Administraziun da taglia ad eruir pli exactamain las resursas persunalas ch'èn necessarias per la refurma. Ils custs da persunal futurs vegnan a depender da la realisaziun chantunala da la refurma, ed els

vegnan esser pli auts, sche la varianta chantunala divergescha essenzialmain da la soluziun federala. Er la realisabladad da la taxaziun automatica vegn a depender da la realisaziun chantunala concreta.

Tar la dumonda 3: Tenor la risposta a la dumonda Dürler menziunada qua survart, èn ils custs unics, ch'èn principalmain custs dad IT, vegnids stimads sin almain 10 miu. francs. Vitiers vegnan custs supplementars periodics da circa 1,5 miu. francs. Fin mez da l'onn 2027 vegn l'Administraziun da taglia a preschentar ina glista detagliada sin basa da stimaziuns dals custs, che ston vegnir procuradas tar furniturs externs. Er tar la IT vegnan ils custs a depender fermamain da la realisaziun chantunala da la refurma.

Tar la dumonda 4: Pertutgadas da la refurma èn la Lescha davart l'assicuranza da malsauns e la reducziun da las premias (LARP; DG 542.100) sco er la Lescha davart la promoziun da la tgira d'uffants complementara a la famiglia en il chantun Grischun (LTGU; DG 548.300). La LTGU è pertutgada, perquai ch'ella renviescha a la LARP. Ins sto partir dal fatg, che la refurma haja consequenzas pertutgant la concessiun da contribuziuns per la reducziun individuala da las premias. L'Uffizi dal servetsch social parta dal fatg, ch'i na dovria naginas revisiuns da leschas en ils secturs da l'agid social e dals impediments. Er ils stipendis n'èn betg pertutgads directamain da l'introducziun da l'imposiziun da taglia individuala.

Tar la dumonda 5: Confurm a la risposta a la dumonda 4 èn pertutgads l'Institut d'assicuranza sociala sco er l'Uffizi dal servetsch social. L'Institut d'assicuranza sociala na po actualmain anc betg giuditgar la lavur supplementara. Er l'Uffizi dal servetsch social na po betg stimar las entradas pli grondas u pli pitschnas, perquai che quellas vegnan a depender da la concepziun tecnica da l'imposiziun da taglia individuala sin plaun chantunal. Sche la transfurmaziun da l'applicaziun da taxaziun mida plinavant las pretensiuns envers las interfatschas existentas, ston ins quintar en il sector da la IT cun custs da transfurmaziun unics ch'èn anc da definir.



En num da la Regenza

Il president:

Martin Bühler

Il cancellier:

Daniel Spadin